

Mah Buktikan Calon 'Kitar Semula' Tetap Berwibawa - Penganalisis

Bernama

Jun 1, 2014

Oleh Zuhafizah Ahmad Zaki

TELUK INTAN, 1 Jun (Bernama) -- Datuk Mah Siew Keong yang didakwa parti pembangkang sebagai 'calon kitar semula' membuktikan mampu memenangi pilihan raya kecil (PRK) Parlimen Teluk Intan semalam kerana beliau adalah seorang yang berwibawa.

Pengarah Pusat Kajian Institut Raja Malaysia Universiti Malaysia Perlis (UniMAP) Profesor Datuk Dr Ramlah Adam berkata Mah, walaupun kalah dalam pilihan raya umum 2008 dan 2013, tidak pernah melupakan pengundinya di Teluk Intan.

Beliau berkata sikap Mah yang sentiasa memberi sumbangan dan perkhidmatan kepada penduduk Teluk Intan adalah antara faktor yang menyumbang kepada kemenangan Barisan Nasional (BN).

"Faktor 'kitar semula' ini menyumbang kepada kemenangan BN," katanya kepada Bernama hari Ahad.

Bagaimanapun, Ramlah berkata pada pemerhatiannya, penyokong Mah terbahagi kepada dua iaitu pengundi luar bandar dan pengundi yang mempercayai BN untuk menguruskan Teluk Intan. Beliau berkata pengundi juga tidak mempunyai banyak masalah dengan Mah yang lebih sederhana, menyenangkan dan sentiasa bekerja kuat.

"Pengundi yakin kepada dasar kerjasama antara kaum, tolak ansur, berunding dan tidak prejudis terhadap orang lain.

"Ini berbeza dengan parti DAP yang memang mementingkan suara orang bukan Melayu walaupun calon mereka Melayu dan dari luar," katanya.

Ramlah berkata kemenangan pada PRK Parlimen Teluk Intan perlu menjadi pendorong kepada BN untuk mementingkan kebajikan dan pembelaan nasib rakyat, terutama masyarakat luar bandar.

Pensyarah Fakulti Sains Sosial dan Kemanusiaan Universiti Kebangsaan Malaysia Profesor Madya Dr Shamsul Adabi Mamat berkata calon 'kitar semula' tidak menjadi

isu kepada masyarakat Teluk Intan bagi memilih wakil rakyat untuk bersuara di peringkat Parlimen.

"Dalam isu calon kitar semula ini, apa yang rakyat tidak mahu ialah seseorang yang tidak berwibawa, tetapi jika calon itu 'boleh menang' dan berwibawa, ini tidak menjadi masalah kerana itu yang diperlukan oleh rakyat Teluk Intan," katanya.

Bagi PRK Teluk Intan, Shamsul Adabi berpendapat pengundi membuat pilihan berdasarkan rekod perkhidmatan Mah, dan dengan itu, isu calon kitar semula hanya dilihat sebagai provokasi politik setempat sebagai usaha kempen parti lawan meraih undi.

"Tetapi pada realitinya, masyarakat di situ mahukan calon yang mempunyai rekod perkhidmatan serta anak jati kawasan.

"Bila calon itu (Mah) menyatakan manifesto beliau, pengundi di Teluk Intan menganggap ia adalah realistik kerana rekod perkhidmatan Mah sudah terbukti. Pengundi lebih memilih rekod perkhidmatan berbanding populariti calon," katanya.

Beliau menyifatkan situasi keputusan di Teluk Intan semalam merupakan satu proses demokrasi yang masih matang apabila pengundi memilih berdasarkan kewibawaan dan kredibiliti calon serta janji pilihan raya yang diluahkan parti politik.

Mah menewaskan calon DAP Dyana Sofya Mohd Daud dengan majoriti undi yang kecil sebanyak 238 apabila meraih 20,157 undi berbanding lawannya yang mendapat 19,919 undi.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1043000>